
Saksnr: 2020/36319-71**Saksbehandlar****Dato:** 09.05.2021

Til: Fylkesutvalet

Frå: Fylkesordføraren

Svar på spørsmål frå Knut Inge Andersen (FNB) om manglande oppslutnad rundt Vestland

Representanten Knut Inge Andersen (FNB) har meldt inn følgjande spørsmål til fylkesutvalet 11. mai 2021:

Manglande oppslutnad rundt Vestland

NRK hadde nyleg ei sak der ei fersk meiningsmåling syner at 63,5 prosent av dei spurde i tidlegare Sogn og Fjordane vil løyse opp det nye storfylket. Berre 22,5 prosent vil halde på Vestland dersom det blir ei folkeavrøysting. Blant hordalendingane er stemninga delt på midten (38,9 mot 37,4 prosent). Når dei to valdistrikta vert handsame som eitt fylke, er det samla sett fleirtal for å dele det nye fylket (43,1 mot 34,9 prosent). Det er kjent at Senterpartiet går til val på oppløysing av Vestland. Det same gjer SV og Raudt. MDG på si side skriv i eit lesarinnlegg i BT den 1. mai (toppkandidatane Hermstad og Dalin): 'Vi i MDG føler ikkje noko kjærleik til det nye storfylket'.

Bompengepartiet FNB har faktisk freista å fremje saker som kan vere med å byggje ein ny Vestland-identitet. Det kan godt handle om symbol. Vi foreslo i Kulturutvalet sist veke at ein ny fylkesstein kunne vere ein ide. Men det vart nedstemt 15 mot 2 røyster.

Spørsmål til fylkesordføraren:

Vestland slit med dårleg oppslutnad og entusiasme. Det er ganske urovekkjande og det ville i ei bedrift ha generert snarlege tiltak for å arbeide med omdømmebygging/PR.

Vil fylkesordføraren ta initiativ til eit PR-program som kan byggje ny entusiasme rundt Vestland?

Fylkesordføraren gir følgjande svar:

Det er mange syn på fylkeskommunen og regionreforma. Fylkesordføraren kjenner sjølv sagt til at somme vil oppløysa Vestland, medan andre ynskjer å vidareutvikle landets viktigaste fylkje. Oppgåva vår er å kvar dag gjere vårt beste, både som folkevalde og tilsette, i å levere tenester og i å utvikla fylket. Fylkesordførar vil mellom anna visa til at på den positive sida, er det nok å visa til årsmeldinga for 2020, som dokumenterer på framifrå vis ein offensiv fylkeskommune.

Fylkesordførar meiner også å registrera relativt få kritiske røyster på jobben som Vestland fylke gjer, ut frå det ein kan forventa som alltid vert debattert kring ein slik organisasjon. Koronaen har ført oss saman med kommunar, arbeidsliv, kultur, idrett og frivillig sektor med ein styrke og eit tempo som me ikkje kunne ha sett føre oss då me starta det nye fylket. Det er faste ordførarmøte mellom fylkesordførar og dei 43 ordførarane, der fokuset er på å utvikla fylket, ta opp relevante utfordringar, sikre sysselsetjinga under pandemien, og å drøfte spørsmål knytt til kultur, idrett og frivilligheit under pandemien. I tillegg inviterer fylkesordførar og fylkesrådmann kommunane til separate kommunemøte, anten på initiativ frå fylket eller kommunen. Her drøftast relevante problemstillingar kommunen tek opp, eller korleis me generelt kan spela kvarandre gode. Tilbakemeldingane eg får frå ordførarane er at Vestland fylkeskommune er tett på, og ein sær viktig samarbeidspartnar for dei. Eg nemner då spesielt dei gode tilbakemeldingane me fekk etter batterifabrikk-arbeidet. Regionalavdelinga og kultur, idrett og inkluderingsavdelinga får også gode skussmål, for å vera sær tett på både kommunar og samarbeidsaktørane. Andre fylkeskommunar ser til oss i dette samspelet. Eg vil også visa til trepartssamarbeidet me har med NAV, LO og NHO under pandemien, her også spelar me kvarandre gode.

Til slutt viser eg til møte med stortingsbenkane, som i teams-forma har vore hyppigare og tettare enn dei var før. Me har gitt viktige innspel, som stortingspolitikarane har hatt bruk for i sine disponeringar under pandemien. Me opplever også god deltaking og entusiasme for høyringsmøte som fylkeskommunen inviterer til.

Kva meining ein har om Vestland lyt helst vera opp til kvar einskild innbyggjar, og det kan stillast prinsipielle spørsmål med om det er rett at fylkeskommunale ressursar brukast til å påverke innbyggjarane sitt syn på fylket gjennom målretta PR-arbeid. Årsakene til at innbyggjarar let vel om dei kommunane og fylka som dei høyrer til, heng nok i stor grad saman med i kva grad dei meiner at politikarar og administrasjonane klarar å levere tenester av verdi kvardagen. Om me skal bruka kreftene våre på noko, er det fylkesordføraren sitt syn at dei bør brukast til å levere nettopp slike gode tenester, planar, og gjere jobben som utviklingsaktør. Dette er ei klar utfordring til oss folkevalde og til administrasjonen, og eg meiner at vi allereie ser teikn til at vi lukkast. Fylkes- og kommunestrukturane vert fastsette av Stortinget. Oppgåva vår er å gjere vårt beste kvar bidige dag. Og fortset vi med det, så er det den beste PR-strategien, om ein vil kalla det så, som vi kan få.

Saksnr: 2020/36319-66**Saksbehandlar:** Lars Erik Lunde**Dato:** 04.05.2021

Til: Fylkesutvalet

Frå: Fylkesordføraren

Svar på spørsmål frå Bjørlo (V) om framdrift for Atløysambandet

Representanten Bjørlo (V) har meldt inn følgjande spørsmål til fylkesutvalet 11. mai 2021.

«Om framdrift for Atløysambandet

Atløysambandet er eit ferjeavløysingsprosjekt på fylkesvegnettet i Askvoll kommune, som ligg inne i økonomiplanen til Vestland med føresett oppstart i 2024. Det er avsett planleggingsmidlar til prosjektet i 2021, for å kome raskt i gang med naudsynte avklaringar (KS2, avklaring av årlege statlege bidrag gjennom den nye og reviderte ferjeavløysingsordninga, etc).

Eit viktig poeng knytt til Atløysambandet er vidare at dagens ferjesamband etter planen skal ut på nytt anbod i 2024. Det vil ved eit nytt anbod vere krav om el-ferje, med dei ekstra investeringane det fører med seg både på ferjemateriell og kaier. Det er difor viktig raskt å få ei heilskapleg sak som gjer greie for dei økonomiske rammevilkåra knytt til gjennomføring av Atløysambandet – både med statlege finansieringsbidrag og «alternativkostnader» for fylket dersom ein må til med nytt ferjeanbod frå 2024.

Kan fylkesordføraren gjere greie for status når det gjeld arbeid i Vestland fylkeskommune med Atløysambandet, for raskast råd å få på plass nødvendige avklaringar om gjennomføring av prosjektet som føresett i vedteken økonomiplan?»

Svar frå fylkesordføraren:

I Retningsliner for ferjeavløysingsordninga for fylkesvegferjer er det krav om at det skal gjennomførast ei ekstern kvalitetssikring av større prosjekt før ein søknad om ferjeavløysingsmidlar kan behandlast av Kommunal- og moderniseringsdepartementet (KMD).

Vestland fylkeskommune har vore i kontakt med KMD for å avklare kva krav som vert stilt til ei ekstern kvalitetssikring i denne samanhengen. KMD har opplyst at kravet om ekstern kvalitetssikring inneber ein gjennomgang av styringsunderlag og kostnadsoverslag for prosjektet.

Vi er no i gang med utarbeiding av naudsynt underlag og dokumentasjon. Når dette er klart vil prosessen med ekstern kvalitetssikring bli starta opp.

Når resultatet av den eksterne kvalitetssikringa er klar vil det bli lagt fram sak til fylkestinget om søknad om ferjeavløysingsmidlar. Truleg vil heile 2021 gå med til arbeidet med ekstern kvalitetssikring, slik at ei sak om ferjeavløysing først vil vere aktuell i 2022.

Det er sett av 1 mill. kr i investeringsbudsjettet i 2021 til prosjektet. Denne løyvinga vil bli nytta til ekstern kvalitetssikring. I økonomiplanen er prosjektet ført opp med ei løyving til oppstart på 10,3 mill. kr i 2024.

Konklusjonen er at vi avhengig av å få gjennomført den eksterne kvalitetssikringa før vi kan gå vidare med prosjektet. Dette arbeidet er som nemnt i gang.

Saksnr: 2020/36319-69**Saksbehandlar****Dato:** 07.05.2021

Til: Fylkesutvalet

Frå: Fylkesordføreren

Svar på spørsmål frå Silja Bjørkly Ekeland (H) om opplæringstilbod idrett

Representanten Silja Ekeland Bjørkly (H) har meldt inn følgjande spørsmål til fylkesutvalet, 11.mai 2021;

1. «Kan fylkesordførar gjere greie for kvifor posisjonen valde å gå imot innstillinga om å opprette 2 klassar idrett?
2. Vil fylkesordførar ta initiativ til å sjå på saka på nytt i ljøs av dei sterke reaksjonane vedtaket har ført til?»

Svar frå fylkesordføreren

Spørsmål 1:

Fylkesordføreren viser til møtet i OPPKO, der drøftingane gjekk på å anten opprette to klassar idrett, eller tre studiespesialiserande og ein klasse idrett. Begge alternativa har konsekvensar, slik det er for alle skular. Grunngevinga for å sikra Sogndal VGS tre parallellar på VG1 SS, er knytt til kva vifte skulen vil kunna tilby av programfag framover. Sogndal VGS har ei brei vifte programfag, og bør ha det vidare.

Spørsmål 2:

Her viser fylkesordføreren til at samarbeidspartia i går sendte melding om at dei ber OPPKO ta saka opp på ny, og der det går fram at samarbeidspartia vil oppretta to klassar idrettsfag og samstundes ber om at skulane i indre Sogn går saman om å sikra ei best mogleg studietilbod framover.